

**UGOVOR**  
**o korištenju prenosne mreže**  
**broj: 01-91/14**

**UGOVORNE STRANE:**

*Kompanija za prenos električne energije u Bosni i Hercegovina "Elektroprenos-Elektroprijenos BIH" a.d. Banja Luka, ulica Marije Bursać 7a, koju zastupa generalni direktor Mato Žarić dipl.ing.el., (u daljnjem tekstu: Kompanija) s jedne strane*

i

*"ENERGY FINANCING TEAM" d.o.o. Bileća (skraćeni naziv EFT d.o.o. Bileća), ulica Srpske Vojske br. 9, 89230 Bileća, PDV broj 401999340007 (u daljnjem tekstu: Snabdjevač) s druge strane*

*Kompanija za prenos električne energije u Bosni i Hercegovina "Elektroprenos-Elektroprijenos BIH" a.d. Banja Luka, ulica Marije Bursać 7a, koju zastupa generalni direktor Mato Žarić dipl.ing.el., (u daljnjem tekstu: Kompanija) s jedne strane*

i

*"ENERGY FINANCING TEAM" d.o.o. Bileća (skraćeni naziv EFT d.o.o. Bileća), ulica Srpske Vojske br. 9, 89230 Bileća, PDV broj 401999340007 (u daljnjem tekstu: Snabdjevač) s druge strane*

zaključuju

## **UGOVOR O KORIŠTENJU PRENOSNE MREŽE**

### **I UVODNE ODREDBE**

#### **Član 1.**

(1) Ugovorne strane saglasne su da je B.S.I. d.o.o. Jajce, za proizvodnju i trgovinu ferolegurama Odlukom Državne regulatorne komisije za električnu energiju (u daljem tekstu: DERK), broj: 05-28-248-22/09 od 24.11.2011. godine, pribavio licencu za obavljanje međunarodne trgovine-uvoz električne energije za vlastite potrebe, te ima kategoriju korisnika.

(2) Ugovorne strane saglasne su da će B.S.I. d.o.o. Jajce (u daljem tekstu: Korisnik) dio potreba za električnom energijom u periodu od 01.11.2014. godine do 31.12.2014. godine podmirivati od Snabdjevača "ENERGY FINANCING TEAM" d.o.o. Bileća koji je licencom DERK-a broj: 05-28-12-440-17/12 od 19.03.2013. godine, registrovan za obavljanje djelatnosti međunarodne trgovine električnom energijom.

### **II PREDMET UGOVORA**

#### **Član 2.**

(1) Predmet ovog Ugovora je uređenje međusobnih odnosa ugovornih strana u vezi uslova za korištenje mreže prenosnog sistema, (u daljem tekstu: mreža) i pripadajuće naknade za korištenje mreže koja se Snabdjevaču naplaćuje u skladu sa Odlukom DERK-a ("Službeni glasnik BiH", broj: 63/14).

(2) Kompanija prema uslovima iz ovog Ugovora vrši prenos električne energije za potrebe Snabdjevača i Korisnika, bez obzira na porijeklo te energije, putem postojeće izgrađene mreže, koja je u vlasništvu Kompanije.

### **III PODACI O MJESTU PREUZIMANJA I OBRAČUNSKOM MJERNOM MJESTU**

#### **Član 3.**

- (1) Prema ovom ugovoru Korisnik preuzima električnu energiju i koristi snagu iz mreže prenosnog sistema na četiri obračunska mjerna mjesta koja se nalaze u TS 110/35/10 kV Jajce 1.
- (2) Obračunska mjerna mjesta se nalaze u trafostanici 110/35/10 kV Jajce 1, na odvodima 35 kV (B.S.I. broj: 1,2,3 i 4).
- (3) Preuzeta električna energija iz mreže mjeri se na obračunskim mjernim mjestima radi obračuna potrošnje električne energije i vršne snage, a radi obračuna naknade za korištenje mreže, u skladu sa ovim Ugovorom.
- (4) Podaci o mjernoj i komunikacijskoj opremi nalaze se na svakom obračunskom mjernom mjestu u trenutku zaključivanja ovog ugovora, mogu se izmijeniti manuelnim mjenjanjem opreme koje će obaviti Kompanija i o tome obavijestiti Snabdjevača, Korisnika i Nezavisnog operatera sistema u Bosni i Hercegovini, radi provjere podataka.

### **IV PREDUSLOVI ZA KORIŠTENJE MREŽE**

#### **Član 4.**

- (1) Snabdjevač i Korisnik će Kompaniji osigurati raspoloživost odgovarajućih podataka o postrojenju Korisnika na zahtjev Kompanije.
- (2) Kompanija će osigurati raspoloživost odgovarajućih podataka o obračunskim mjernim mjestima i mjernim podacima koji služe za obračun i plaćanje naknade za korištenje mreže iz ovog Ugovora.
- (3) Kompanija će svojom pripadajućom bazom podataka obuhvatiti podatke Korisnika iz stava 2. ovog člana i staviti ih na raspolaganje ostalim učesnicima iz člana 3. stav (4) ovog Ugovora.
- (4) Svi podaci kojim Kompanija raspolaže u skladu sa odredbama ovog Ugovora smatrat će se poslovnom tajnom, te podliježu obavezi osiguranja tajnosti kao i preduzimanja razumnih mjera za zaštitu njihove tajnosti i sigurnosti.

### **V USLOVI ZA KORIŠTENJE MREŽE**

#### **Član 5.**

Kompanija je dužna s pažnjom dobrog stručnjaka voditi pogon mreže, organizovati održavanje mreže i ostvariti uslugu ponovne uspostave napajanja nakon prekida s ciljem minimiziranja broja prekida i vremena trajanja prekida, osim u slučajevima kada do prekida dođe dispečiranjem.

#### **Član 6.**

- (1) Prema ovom ugovoru Korisnik se smatra krajnjim korisnikom priključka i mreže, te nema pravo omogućiti drugom pravnom ili fizičkom licu priključenje na svoje elektroenergetske objekte i instalacije i korištenje električne energije preko svog obračunskog mjernog mjesta.

(2) Ugovorne strane su saglasne da će sve potrebe vezane za promjene u korištenju priključka i mreže, kao što je priključenje i korištenje mreže od strane drugog lica, uređivati u dogovoru i u skladu sa odredbama Opštih uslova.

## **VI MJERNE USLUGE**

### **Član 7.**

(1) Kompanija pruža standardnu mjernu uslugu za obračunska mjerna mjesta iz ovog Ugovora, koju čine sljedeće usluge:

- održavanje mjerne opreme obračunskog mjernog mjesta,
- ovjeravanje mjerila obračunskog mjernog mjesta,
- prikupljanje mjernih podataka s obračunskih mjernih mjesta,
- provjera i potvrda valjanosti mjernih podataka,
- upravljanje i pohranjivanje mjernih podataka,
- čuvanje dokumentacije obračunskih mjernih mjesta,
- povremena provjera ispravnosti stanja mjerenja na obračunskim mjernim mjestima.

(2) Kompanija je dužna u okviru standardne mjerne usluge utvrđene Mrežnim pravilima, s obračunskih mjernih mjesta prikupljati, obrađivati, provjeravati valjanost, pohranjivati i učiniti dostupnim u formi potrebnoj za preuzimanje mjernih podataka za potrebe Snabdjevača i ostalih učesnika.

## **VII NAKNADA ZA KORIŠTENJE MREŽE**

### **Član 8.**

(1) Ugovorne strane saglasno utvrđuju da je Snabdjevač dužan plaćati naknadu za korištenje mreže za ugovoreni obračunski period, za kompletno preuzetu električnu energiju i vršnu snagu, u skladu sa Tarifnim sistemom, važećim iznosima tarifnih stavki i uslovima uređenim ovim Ugovorom.

(2) Ispunjenje obaveze plaćanja naknade za korištenje mreže u roku važenja ovog Ugovora Snabdjevač i Kompanija ugovaraju kao bitni sastojak Ugovora.

## **VIII OČITANJE, OBRAČUN I NAPLATA NAKNADE ZA KORIŠTENJE MREŽE**

### **Član 9.**

(1) Mjerila koja služe obračunu potrošnje električne energije i korištenja električne snage prema ovom ugovoru redovno se očitavaju na kraju ugovorenog obračunskog perioda od  $30 \pm 3$  dana što se smatra standardnom uslugom, a troškovi se plaćaju iz naknade za mjerne usluge kao troškovi standardne usluge.

(2) Kompanija je dužna u okviru standardne mjerne usluge s obračunskih mjernih mjesta prikupiti, obraditi, provjeriti valjanost, pohraniti i učiniti dostupnim za preuzimanje Snabdjevaču mjerne podatke u formi koja je potrebna za obračun prema ovom Ugovoru i izvršiti obračun naknade za korištenje mreže, u skladu sa Tarifnim sistemom i odredbama ovog Ugovora.

(3) Na obračunskom mjernom mjestu, prisutni predstavnici ugovornih strana (Kompanije i Snabdjevača) očitavaju mjerila svakog prvog u mjesecu sa početkom u 7.00 sati i podatke unose u zapisnik o očitavanju koji potpisuju. U slučaju da se podaci po osnovu manuelnog

očitanja i podaci dobiveni daljinskim očitanjem ne slažu, ugovarači će komisijski utvrditi razliku i način rješavanja naplate po osnovu utvrđene razlike po tim očitanjima.

#### **Član 10.**

Izuzetno enegija potrebana za pokrivanje gubitaka prenosa za prenesenu energiju za potrebe Korisnika biće obračunta i izmirivana prema opštim pravilima koje utvrđuje DERK.

#### **Član 11.**

(1) Obračun naknade za kompletno preuzetu energiju i vršnu snagu provest će se na kraju svakog ugovorenog obračunskog perioda prema članu 9. stav (1) ovog Ugovora, a u skladu sa odredbama Tarifnog sistema i ovoga Ugovora.

(2) Ako se utvrdi da mjerila određeno vrijeme nisu registrovala energiju i/ili snagu ili je registriranje bilo nepotpuno ili nepravilno, Kompanija će uz znanje Snabdjevača provesti postupak procjene vjerodostojnih vrijednosti obračunskih energetske veličina, u skladu sa odredbama Opštih uslova.

(3) Kompanija je obavezna račun sa obračunom naknade za korištenje prenosne mreže dostaviti Snabdjevaču u roku od 5 dana po očitanku na adresu:

"ENERGY FINANCING TEAM" d.o.o. Bileća (skraćeni naziv EFT d.o.o. Bileća), ulica Srpske Vojske br. 9, 89230 Bileća.

(4) Na traženje Snabdjevača račun će mu se dostaviti odmah po njegovom izdavanju i to telefaksom ili elektronskom poštom.

(5) Snabdjevač je dužan obavijestiti Kompaniju, ako ne zaprimi račun u ugovorenom roku.

#### **Član 12.**

(1) Rok dospjeća računa za obračunski period je 15 dana od dana izdavanja računa.

(2) Snabdjevač je dužan svoju obavezu plaćanja naknade za korištenje mreže izvršiti na žiro račun Kompanije:

- račun broj: 5510010003400849 otvoren kod Unicredit Bank – Banja Luka ili

- račun broj: 1610450028020039 otvoren kod Raiffeisen Bank - Banja Luka.

(3) Ukoliko Snabdjevač ne plati dospjelu obavezu na način i u roku utvrđenom ovim Ugovorom, dužan je platiti račun uvećan za zakonsku zateznu kamatu.

(4) Kompanija će obračun zateznih kamata provesti s datumom podmirenja dugovanja, a Snabdjevač je obavezan platiti s rokom dospjeća od 15 dana, počev od dana izdavanja obračuna zateznih kamata.

(5) Ako Snabdjevač nije saglasan s iznosom ispostavljenog računa, dužan je nesporni dio platiti u roku dospjeća, a za sporni dio dostaviti pisani prigovor u roku od 15 dana od dana izdavanja računa.

(6) Kompanija je dužna odgovoriti na prigovor Snabdjevača najkasnije u roku 8 dana, od dana prijema prigovora. U slučaju prihvatanja prigovora Kompanija se obavezuje dostaviti novi račun s datumom dospjeća 10 dana od dana izdavanja računa.

(7) U slučaju neprihvatanja prigovora, Kompanija će o istome obavijestiti Snabdjevača koji je dužan platiti prvobitno ispostavljeni račun, uvećan za zakonsku zateznu kamatu. Iznos kamate će se iskazati u računu slijedećeg obračunskog perioda.



### **Član 13.**

- (1) Za osiguranje urednog izvršenja svih obaveza koje mogu nastati po osnovu ovog Ugovora, Snabdjevač se obavezuje, u trenutku potpisa ugovora, dostaviti Kompaniji bankarsku garanciju sa rokom važenja do 01.02.2015. godine, u iznosu od očekivanog jednomjesečnog iznosa plaćanja usluge prenosa električne energije, tj. u iznosu od 156.597,90 KM.
- (2) U slučaju da Snabdjevač ne plati mjesečni račun za korištenje mreže ili kamate u ugovorenom roku, Kompanija zadržava pravo naplate putem instrumenta osiguranja plaćanja iz stava (1) ovog člana, o čemu će prethodno pisanim putem obavijestiti Snabdjevača.
- (3) U slučaju da Kompanija iskoristi bankarsku garanciju iz stava (1) ovoga člana, Snabdjevač je dužan dostaviti Kompaniji na njegov prvi poziv istovjetni instrument osiguranja plaćanja.
- (4) Ukoliko u periodu trajanja ovoga Ugovora budu zakonskim propisima uvedeni novi instrumenti osiguranja plaćanja ili je prethodni iskorišten, Snabdjevač je na zahtjev Kompanije dužan osigurati i dostaviti odgovarajući broj takvih instrumenata osiguranja plaćanja.
- (5) U slučaju neizvršenja obaveza Snabdjevača iz ovog člana Kompanija može jednostrano raskinuti ovaj ugovor.

## **IX MEĐUSOBNA PRAVA I OBAVEZE**

### **Član 14.**

Ugovorne strane su saglasne da se Kompanija oslobađa preuzetih obaveza u pogledu kvalitete snabdijevanja električnom energijom za vrijeme trajanja više sile, poremećenog pogona mreže, izvanrednog pogona mreže, neispravnosti i kvarova na uređajima i postrojenjima, planiranih radova, te ostalih okolnosti koje nije mogla spriječiti, otkloniti ili izbjeći.

### **Član 15.**

- (1) Ugovorne strane se saglasno obavezuju na međusobno obavješćavanje o planiranom i izvanrednom prekidu korištenja mreže odnosno snabdijevanja električnom energijom kao i o događajima u mreži koji su uzrok nemogućnosti korištenja mreže i snabdijevanja, a u skladu sa odredbama Opštih uslova za snabdijevanje električnom energijom i Mrežnih pravila.
- (2) Ugovorne strane su saglasne da će Snabdjevač i Korisnik biti obaviješteni o planiranom prekidu isporuke električne energije najkasnije 48 sati prije privremenog prekida i to direktnim načinom kao telefonom, telefaksom ili elektronskom poštom.

### **Član 16.**

Ugovorne strane su saglasne da Kompanija može bez prethodne najave privremeno ograničiti ili prekinuti isporuku električne energije Korisniku ako to zahtijevaju prekidi u mreži prenosnog sistema, kvarovi na transformatorskim, razvodnim i proizvodnim postrojenjima, raspad elektroenergetskog sistema i preopterećenja postrojenja, odnosno pogonski uslovi.

## **X RASKID UGOVORA**

### **Član 17.**

- (1) Ugovorne strane su saglasne da mogu u slučaju neizvršenja ugovornih obaveza podnijeti pisani zahtjev za raskid ugovora, uz otkazni rok od 8 dana od dana podnošenja zahtjeva.
- (2) Ugovorna strana koja pokreće postupak raskida obavezuje se prije podnošenja pisanog zahtjeva za raskid ugovora dostaviti pisanu opomenu drugoj ugovornoj strani s dodatnim rokom za ispunjenje obaveze.

## **XI PRELAZNE I ZAVRŠNE ODREDBE**

### **Član 18.**

- (1) Ugovorne strane utvrđuju da je zatečeno stanje vlasništva nad mjernom opremom takvo da je Kompanija vlasnik mjerne opreme na obračunskim mjernim mjestima. U slučaju potrebe Kompanija će ostvariti opremanje obračunskih mjernih mjesta električne energije prema tehničkim zahtjevima iz Mrežnih pravila.
- (2) Saglasno ovom Ugovoru, tokom prelaznog perioda dok Kompanija u cijelosti ne izvrši svoju obavezu potrebnih prilagođavanja mjerne opreme obračunskih mjernih mjesta prema tehničkim zahtjevima iz Mrežnih pravila i prema stavu (1) ovog člana, očitavanje i obrada podataka na obračunskim mjernim mjestima će se obavljati kao i do sada.

### **Član 19.**

- (1) Ovaj Ugovor se zaključuje na period od 01.11.2014. godine do 31.12.2014. godine.
- (2) Ovaj ugovor prestaje važiti u slučaju da Snabdjevač ili Korisnik izgube taj status.
- (3) Primjena ovog Ugovora može se produžiti zaključenjem aneksa Ugovora.
- (4) Ovaj Ugovor stupa na pravnu snagu kada ga potpišu obe ugovorne strane.

### **Član 20.**

- (1) Ugovorne strane saglasne su da će sve eventualne sporove koji mogu nastati iz ovog Ugovora rješavati sporazumno.
- (2) U slučaju nemogućnosti mirnog rješavanja sporova iz ovoga Ugovora nadležan je Okružni privredni sud u Banja Luci.

### **Član 21.**

Ovaj Ugovor je sastavljen i potpisan u šest istovjetnih primjerka, od kojih Kompanija zadržava četiri primjerka, a Snabdjevač zadržava dva primjerka.

U Banjalući, 11. 11. 2014. godine  
Broj: 01-14356/2014

Za Kompaniju:

Mato Žarić, dipl.ing.el.

*Mato Žarić*

Cvjetko Žepinić, dipl.ing.el.

*Cvjetko Žepinić*



U Bileći, 13. 11. 2014. godine  
Broj: 159/14

Za Snabdjevača:

*Imperija*

*Ranka Čokorilo, dipl.ing.el.*

